

HENDE MUHER A CONQUISTA CARERANAN CU TABATA RESERVA PA HOMBER SO

Por worde considera cu dentro di e triunfonan economico cu podise, e movimiento feminista a trece cune cu mas éxito, ta e logro di habri e porta pa hendenan muher por incursiona den careranan profesional cu tradicionalmente tabata exclusivo pa hende homber. Abogacia, Medicina, Administracion Empresarial, y Ciencianan Politico, ta cuatro ehemplo clasico di e camponan cu hende muher tin acceso awendia y cu algun decada atras, e mercado laboral tabata tin reserva pa hende homber so.

Segun Barbara Ehrenreich, den su buki "Fear of Falling: The Inner Lifer of the Middle Class", bay universidad tabata manera e fortaleza di e clase medio durante mas cu mitad di siglo XX, pero te poco decada pasa, preparacion universitario tabata mas tanto reserva pa hende homber.

Na momento cu e Movimiento Feminista a resurgi den e decada 70, a inicia practicamente un ataque frontal for di dos fila feminista, contra e profesionnan cu tabata tradicionalmente masculino.

Di un banda, e grupo di hendenan muher cu tabata exige pa nan worde permiti di drenta universidad cu igualdad di condicion cu hende homber, y di otro banda, esnan cu a cuestiona e exclusividad, pretercion di obhetividad científico y responsabilidad di servicio publico, cu tabata destina pa hende homber so.

E seguidornan di e movimiento

feminista tabata boga pa hende muher por a bira docter, pero alavez a lucha pa elimina tur sorto di elitismo for di e carera di medicina, y fomenta e especializacion y participacion di trahadornan femenino ocupa, den e tereno di salubridad, cu cargonan mas modesto manera e parteranan autodidacta, auxiliarnan di enfermeria, etc.

Na dado momento e movimiento feminista a haya su mes atrapa den un sentimiento ambiguo, cual no tabata refleha nada otro cu un dilema. Kico e movimiento feminista tabata pretende?. Elimina loke nan tabata considera como un sociedad capitalista domina pa hende homber?. Of, simplemente ocupa un lugar den dje?. "Ta kico nan a cuminsa, un revolucion, of un proceso di asimilacion?", ta dos pregunta cu Barbara ta señala den su buki, como categorico na e momentonan specifico ey.

E ta splica cu nan final, e coriente principal di feminismo a termina pa defende un pensamiento claro y sin confusion algun, di asimilacion, alomenos cu e speranza cu e hendenan muher lo por a "humaniza" di algun manera, e puestonan laboral y social cu nan tabata pretende di logra.

Di tal manera hopi hende muher a infiltra den e camponan cu prome tabata domina exclusivamente pa hende homber, manera, e.o. Medicina y Cirugia, Abogacia, Administracion di Empresa y Politica.

Educacion di Mucha: E DESAFIO DI MAS GRANDI PA E "LIBERACION FEMENINO"

Na medida cu e movimiento di liberacion femenino (mundial) a impulsa mas hende muher pa bira profesional den e ramanan cu tabata reserva prome pa hende homber so, y cu mas muher a incursiona den otro terenonan laboral, mientras cu tambe nan tabata cumpliendo cu nan rol di mama, e crianza y educacion di mucha a bira e desafio di mas grandi pa nan y te awe, e ta asina.

Na cuminzamento di e decada 70 e mamanan cu tabata pertenece na clase medio tabata sinti nan mes hopi afortuna si nan tabata por haya un speelschool of un persona di confianza pa yuda nan den e cuidu y crianza di nan yiu(nan), tanten cu nan tabata trahando.

Barbara Ehrenreich ta señala den su buki, den e decada 80 a surgi un doble competencia. Di un banda varios universidad priva a habri nan porta pa duna e studentenan mas oportunidad.

E poblacion studentil a casi triplica cu e incorporacion di hende muher den careraran profesional, inmediatamente despues di caba school secundario.

Di otro banda a surgi e competencia di cantidad di guarderia cu a habri pareu, y cu practicamente a cuminsa bira "e negoshi di e momento" pa alivia e carga di e mamanan cu ta traha.

A surgi un periodo di reflexion di hende muher, cu no tabata mucho convenci si nan tabata desea di perde e prome añanan di crecemento di nan yiu(nan) y laga nan educacion, durante 8 ora diario of despues di school, den man di otro hende, cu kizas no tabata cualifica pa educa y mucha(nan) bao cierto reglanan di disciplina moral y intelectual.

Na 1980 por bisa cu a nace



"dudanan nobo" den e pensamiento di e hendenan muher libera.

Basa riba e dilema nobo aki, Betty Friedan a publica na aña 1981 su buki "E segundo Fase" (The second stage) di e feminismo di Merca.

Na dado momento Betty ta expresa: "Nos obhetivo tabata un participacion pleno den e poder; voz y voto di e coriente predominante di e pasado (hende homber); dentro di e partidonan politico y den e proceso politico mes; ehecucion di profesionnan, y den e mundo di negoshi".

Pues cu otro palabra "e asimilacion" no tabata facil, y apesar di e frutonan logra a traves di e lucha, e hendenan muher a bira atrobe afligi pasobra asumi un doble rol, esta, trahador (profesional of no), mama y ama di cas, tabata hopi biaha inalcanzable.

For di e analisis aki y adaptando su contenido na e bida actual por asumi y conclui, cu casi dos decada despues y casi na

drempel di aña 2000, e problema no a haya solucion, pero mas bien e exigencianan di e epoca contemporaneo ta obliga mas hende muher cu tin yiu, traha y sigui traha.

Aunque no por culpa e movimiento feminista (cual a traspasa e fronteranan di Merca y a acapara casi resto di mundo) di e situacion di soledad, y di abandono den algun caso, cu hopi di nos hobennan ta sufri awendia (pues, e meta tabata husto), tampoco por nenga cu e liberacion femenino a trece un separacion involuntario di mama cu yiu, loke, segun cada caso specifico por a, y sigui afecta den mayor of menor medida e relacion familiar y e crianza y educacion di yiu.

E falta no ta den e hecho cu hende muher a bringa pa su derechonan, sino na e patron cultural y casi mitologico, cu inhustamente a worde crea prome cu e muher a lanta voz pa reclama su posicion mereci den e mundo aki, y pa cual motibo movimiento feminista a nace.

E mito cultural casi comun na tur pais, ta loke a pone riba e hende muher su lomba un responsabilidad cu no tabata worde comparti pa su pareha, y cu a pone un stempel di fuerza unico, di autoridad y mando riba hende homber y un stempel di fragilidad, debilidad y sumision den hende muher.

Yega na un igualdad ideal y total, y comparti tur responsabilidad di cas cu igualdad di condicion den famia, ta un reto cu si worde logra algun dia, e lo tuma su tempo ainda pa ser alcanza, y pa por papia di un balansa social den beneficio di humanidad.

8 Maart Dia Int. di Hende Muher

*Nos Kier
Felicitá Tur
Muher Ariba
nan Dia*



**General Construction
& Excavations N.V.**



Stadistica di e muher Arubiano trahador aki na Aruba

